

INUIT ATAQATIGIIT

INATSISARTUNI



Nuuk, den 9. juli 2013

Inatsisartut Suleriaasianni § 37 naapertorlugu Naalackersuisunut imaattunik apeqquteqarpunga.

(Inatsisartuni ilaasortaq Sara Olsvig, Inuit Ataqatigiit)

Apeqqutit:

- 1) Naalackersuisut ilimasaarereerput atortussiassanik radiop qinggornerinik navianartortalinnik pīaanngilluinnarnissamik atorunnaarsitsisussamik inatsisissatut siunnersuusiorniartut. Inatsisissatut siunnersuutip aamma kingunerissavaa pīaanngilluinnarnissamik atorunnaarsitsineq uranimik tunisassianillu allanik radiop qinggornerinik navianartulinnik avammut tunisisinnaalernissaq?
- 2) Aatsitassanik pīaaneq eqqarsaatigalugu saniatigut pissarsiat pingaarnertullu pissarsiat killingat sumiippa, piffissamilu piaaffiusumi saniatigut pissarsiat pingaarnertut pissarsiannorsinnaappat?
- 3) Nunat tamalaat akornanni isumaqatigiissutit suut malinneqartussaappat uranimik atortussianilluunniit allanik radiop qinggornerinik navianartortalinnik pīaasoqassagaluarpat, taakku pingaarnertut, saniatigut imaluunniit sinnikutut pissarsiarineqassappata?
- 4) Naalackersuisut isumaqarpat, nunat tamalaat akornanni isumaqatigiissutit tamakku isumannaatsuusut taamalu uranip atortussiassalluunniit allat assingusut inuttassarinningsaminnut anngutinnginnissaannik qulakkeerrinnittut?
- 5) Uran atortussiassallu radiop qinggornerinik navianartortallit allat qanoq kimittutigalutillu annertutigisut aatsitassani saniatigut pissarsiat nunat tamalaat nakkutilliisui nunanilu tamalaani nalunaarusiornissamut pīmasaqaatit avaqqullugit avammut tunisassiarineqarsinnaappat?
- 6) Uran atortussiassallu radiop qinggornerinik navianartortallit allat qanoq kimittutigalutillu annertutigisut pīaaffinninngaanneersut Kalaallit Nunaanni uninngatinneqarsinnaappat nunat tamalaat nakkutilliisui nunanilu tamalaani nakkutilliisusanut nalunaarusiornissamut pīmasaqaatit avaqqullugit?
- 7) Uran atortussiassallu radiop qinggornerinik navianartortallit allat qanoq kimittutigissappat pīaanermi uninngatitsinermilu suliffimmi avatangiisigtigut aammalu avatangiisinik, pinngortitamik pisuussutinillu uumassusilinnik radiop qinggornerinut navianartunut illersuinissamut pīmasaqaatit atuutilissappata?

Tungavilersuutit:

Naalackersuisut uranimut politikkertik pillugu assigiinngitsunik avammut nalunaaruteqarnikuupput. Kingullermik nalunaarutigineqarpoq uranimik atortussiassanillu radiop qinggornerinik navianartortalinnik allanik pīaanngilluinnarnissamik aalajangiussap atorunnaarsinneqarnissaa pillugu siunnersuut ukiamut Inatsisartut ataatsimiinnissaanni saqqummiunneqassasoq. Tamanna nalunaarutigineqarpoq

innuttaasut Inatsisartulluunniit paasissutissanik pisariaqartunik, soorlu urani pillugu suleqatigiissitamit Naalakkersuisut qallunaallu naalakkersuisuisa peqataaffigisaannit, pissarsinngitsulluunniit. Tassami paasinarsivoq urani pillugu suleqatigiissitap sulinera kinguaattoortoq, soorlu aamma suleqatigiissitap suliaanik sulii avammut ilisimatitsisoqanngitsoq.

Taamaattumik Inuit Ataqatigiinnut pisariaqarpoq apeqquateqaateqaqqinnissaq, ilaatigut paaserusullugu 'saniatigut piiakkanik' taagukkat Naalakkersuisut qanoq isumaqartinneraat, tamanna pillugu siusinnerusukkat § 37 naapertorlugu apeqquut naammaginartumik akissuteqarfigineqarsimanngimmat. Tamatumuuna ilaatigut paaserusunneqarpoq nunat tamalaat akornanni nakkutilliinissamut aqqissuus-sinerit atuuttut Naalakkersuisunit qanoq isumaqarfigineqarnersut, uranip imaluunniit yellowcake'mik taagorneqartup inuttassarinningsaminnit pissarsia-rineqannginnissaanik qulakkeerinnittutut immikkut ilisimasalinnit nalilerneqartut, naak isumaqatigiissutit nunamit tunisassiortumit eqquutsinniarneqaraluartut.

Inuit Ataqatigiit isumaqarput paasissutissat pingaaruteqarluinnartut tamakku pigineqartinnagit, Inatsisartullu uranip atortussiassallu radiop qinngornerinik navianartortallit avammut tunisassiarilernissaat siunertaralugu paaanissaq pillugu imaluunniit paaanissaq piiakkat radiop qinngornerinik navianartunik akullit sinnikutut Kalaallit Nunaanni uninngatinnissaasa kingunerisinnaasaat pillugit tamakkiisumik paasissutissinneqarsimatinnagit, paaanngilluinnarnissamik isuma allanngortinneqartariaqanngitsoq. Taamatuttaaq Inuit Ataqatigiit isumaqarput tamakku tamaasa pillugit innuttaasut tamakkiisumik ilisimatinneqartariaqartut aalajangiinissamilu peqataatinneqarnerujussuullutillu ammanerusumik akuutinne-qartariaqartut, qinersinerup inerneranik innersuussuteqaannarnani kisimiillunilu aalajangiinnarani, soorluli Naalakkersuisut maannakkut taamaaliorniarsarisut.

Uranimik atortussiassanillu radiop qinngornerinik navianartunik allanik paaanissaq, avammut tunisassiornissaq aamma/imaluunniit uninngatitsinissaq pillugit Naalagaaffeqatigiinni akisussaaffiit qanorluunniit agguataarsimagaluarpata, paaanngilluinnarnissamik ullumikkut atuuttumik allannguinnissamik aalajangiussineq malunnaatilimmik pequtaassaaq Naalagaaffeqatigiinnerup sillimaniarnikkut politikianik allannguisoq, uagullu nunat tamalaat akornanni uranimik tunisas-siortutut imaluunniit tunisassiortuunngitsutut inissisimanitsinnik allannguisoq. Taamatut aalangiussinissamut aamma pisariaqarpoq Kalaallit Nunaanni Naalagaaffeqatigiinnilu pingaarutilinnik ilisimasaqalersimanissaq aqqissuussisimanissarlu paaanngilluinnarnissamik allannguinerup kingunerisinnaasaanik isumaginnif-fiusussamik. Ullumikkut taamaattoqanngilaq.

Tamakku saniatigut paaanngilluinnarnissamik allannguisoqassappat inatsisilior-nikkut sukumiisumik innuttaasunillu akuutitsiffiusumik sulisoqaqqaartariaqarpoq. Naalakkersuisut tamanna naammassinngilaat Inatsisartunit apeqqutit ilunger-sunartut ilaannakortumik tamakkiisuunngitsumillu akissuteqarfigisaramikkut innut-taasullu peqataatinngagit aalajangiinissaq siunniussimallugu. Tamatumuuna tamat oqartussaaqataanerannik misigisimaneq innarlerneqarpoq inuiaqatigiinnilu tamat oqartussaaqataanerat sanngiillisinneqarluni.

Qinnutigissavara apeqqutit ullut sulliviit qulit ingerlanerini akineqassasut.